

**ՖՈՐՄԱՆԻ ՀԵՔԻԱԹԸ / Հայ ժողովրդական հեքիաթներ, Հատոր VIII / Գուգարք (Լոռի),
Լոռու բարբառ (խոսվածք)**

Ըլել ա, չի ըլել մի ֆորսկան մի քաղաքի միչում: Շատ ֆորս գնալիս ա ըլում: Սա մի ախչկա սիրած ա ըլում: Վերջը շատ չալիշ ա գալի, ախչկա տերը տալիս չի, գոռագի փախցնում ա ախչըկան:

Ախչկա ախպերտինքը ման են գալի, որ գտնեն իրանց քվորը փախցնողին, սրպանեն: Էս տղեն իմանում ա, որ իրան ախըրը չկա, վերջը սպանիլ պտեն, կնիկը վեր ա ունենում, էդ երկրիցը փախչում:

Գնում ա մի անվերի վերանա տեղ, իրա հմա մի տուն շինում, ապրում: Սա էն ա իրա արհեստը էն ա ըլում, որ ռավոտը ֆորս ա գնում, բիկունը գալի: Սա թե շատ ա կենում, թե քիչ ա կենում ընդի, էն սամթումը իրեք ախպեր դն են ըլում. Էս դների մինը օրի մի վախտը տենում է, որ էդ ձորում մերու միջին մի ծուխ ա վեր ըլում:

Ասում ա.— Էսքան վախտը մենք ըստի ման ենք գալի, ըստի ծուխ տեհել չենք, էս ի՞նչ մարդ ա, որ էկել ա ըստի ծուխ ա արել: Կըլի գնանք մտիկ տանք, տենանք սա իսա՞ն ա, ջանավա՞ր ա, էս ի՞նչ բան ա:

Ախպերտինքն ասում են.— Գնա՛նք:

Գալիս են տան դուռը, տենում են մի գեղեցիկ հարսը տան միջին:

Մենձ Դեր ասում ա.— Սա օղլուշաղ ա, կվախի, դուք հեռացեք, էս մտնեմ, տենամ ով ա:

Ախպերտինքը հեռանում են, նա նի ա մտնում էդ հարսի հետ խոսում ա, ասում ա.— Ա՛հ հարսը, էդ ի՞նչ խիզան ես, որդիան ես, ի՞նչ ես:

Էն հարսը խոսում չի. մի անգամ էլ ա հարցնում, թե.— Խոսա՛, ինձանե վախիլ մի, էս քե հավատարիմ կլիմ,— ասում ա:

Հարսը, որ տեղը շատ նեղում է, ասում ա.— Ես մի անիրավ մարդ ունեմ, որ շատ զոռ գյուլլա գցող ա, էն ինձ փախցրել ա, բերել ըստի: Հըմի կիմանա քու ըստի գալը, համ քեզ կսպանի, համ էլ ինձ, քաշվի՛ր ըստիան:

Էս Դևի սերն ընկնում ա էս հարսի վրա, ոչ գիտի դուս ըլի, ոչ գիտի մնա տանը:

Սա իրան մտքումն ասում ա. «Գնամ ախպորտանցըս հետ մասլահաթ անեմ, գամ»: Սա դուս ա գալի ախպորտանցն ասում ա, թե.— Սա մի գյուլլա գցող մարդ ունի, որ հեռվից մեզ կվնասի, մոտիկ չի գալ, որ բռնենք, խեղդենք, կնիկն էլ մի շատ գեղեցիկ հարսն ա:

Ախպերտինքն ասում են.— Ման գանք էդ տղին գտնենք, հեռվից տենանք ինչ թավուր մարդ ա, թվանք կա՞ վրեն, նոր մեր բանը տենանք:

Դրանք էդ խորուրդումն ին, էդ բիգունը էդ ֆորսկանը էկավ տուն, էկավ տեհավ կնկա քեֆը խարաբ ա:

Թե.— Ա՛յ կնիկ, էդ ի՞նչ խաբար ա:

Էլ էդ դների անումը տվուց ոչ:

Թե, բա.— Ինձ բերել ես մենակ դրել ես ըստի, ցերեկը գնում ես հանդերը ման գալի, էս մենակ ըստի մլորվում եմ, մի գրիցաընկեր չկա կշտիս:

Թե, բա.— Ա՛յ կնիկ, ի՞նչ անեմ, ի՞նչ չանեմ:

Թե.— Մի կատու էլ ա կա ոչ, որ հետը մըլոլ անեմ, պար ածեմ, գոգումս դնեմ, ժամանակ անցնի:

Ասում ա.— Էքուց էվեթ կերթամ քիզ հմա որդիան որ ըլի, մի կատու կգտնեմ:

Ռավոտը վիկացավ ու գնաց կատվի ման գալու, էլ նա կարաց ոչ որ շենլիկ գա, որ կատու տանի. մի խարաբա կար, գնաց էդ խարաբեն, տեհավ հրեսիկ մի կատու ըստի կլավում ա: Էս կատվին բռնեց բերուց տուն:

Թե.— Ա՛յ կնիկ, ուզածդ բերել եմ:

Կնիկը շատ ուրախացավ:

Մարդ ու կնիկ էդ կատվին մի որդու դդար սիրեին: Հացը, որ ուտելիս ըլեին, կատուն հետներուն ուտեր:

Մի քանի օրից եղը Էս Դևը ախպորտանցը ասավ.— Ես գնում եմ էն հարսի կուշտը, դուք ձեզ հմա կացեք ըստի:

Էս Դևը Էկավ ռավոտը, տեհավ մարդը գնացել ա ֆորսի, Էկավ էն հարսին բարով էրետ, էդ հարսը խոսաց ոչ:

Որ շատ էս հարսի տեղը նեղեց, հարսն ասավ.— Չե՞ որ քեզ ասի՝ սըպանիլ կտամ, գալ մի, ընլի՞ ես Էկել:

Սա սկսեց սրան միննաթ անիլը.— Քեզ սպանեմ, դիմիշ չեմ անում, խնդրում եմ՝ միավորվենք մենք իրար հետ:

Դա ասավ.— Պա՛, պա՛, պա՛, էդ գրիցը մեկ ասիր, մեկ էլ չասես:

Մինչև կեսօր խնդրվեց, եղնա սկսեց վախեցնել: Խյուլասա՝ կամքը կատարեց: Էդ կնկա սերը ընկավ էդ Դևի վրա, իրա մարդուց ավելի ա սիրում: Էրկու-իրեք օր գնաց, Էկավ:

Մին օր էլ կնիկն ասավ.— Ըտենց գնալով-գալով Ֆորսկանը քե կտենա, կսըպանի. բի մի բան անենք, որ միշտ ըստի ըլիս:

Բերին տան դրադին մի ֆոր կտրեցին, քշերը մտավ Դևը էդ ֆորը, ռավոտը վեր էլավ, ըտենց միխելի ժամանակ անց կացրին, եղնա մի օր Դեն ասավ.— Ըսենց չվել ե՞փ վախվիսելեն ապրինք, ես մի ծաղկի տեղ գիտեմ, ընդունց որ ցանենք, համեմի պես դուս կգա, ընդունց որ նրա բաժինի մեջ քցենք, կուտի, կմեռնի:

Սրանք էդ համեմը ցանեցին էն ֆորի դրադին, դուս Էկավ, կնիկը հաց շինեց, իրանց բաժինը ինքն ու Դևը կերան, կշտացան, նրա բաժնի մեջ գցեցին ու կրակի դրադին ծածկեցին, որ Ֆորսկանը գա ուտի: Էկավ Ֆորսկանը, նստեց, որ հացն ուտի, բաժինը դրուց կնիկն աղաքին: Կատուն վազեց գոգը նստեց: Ֆորսկանը, վի կալավ պատառը, որ բերանը տանի, կատուն տվեց չանկով վեր գցեց, մի անգամ էլ վի կալավ, էլի կատուն չանկով խփեց, իրեք անգամ վի կալավ՝ իրեք անգամ էլ կատուն տվուց վե գցեց:

Կնիկը նեղացավ ըտի, թե.— Անտեր մնա դա, թողում չի հաց ուտես, վրա արա դենը գցի:

Ֆորսկանը կատուն դրադին դրուց, մի պատառ վի կալավ դրուց աղաքին, որ ուտի, կատուն թիքեն կերավ թե չէ՝ տրաքեց, Ֆորսկանը տեղիցը կաղնեց, ասավ.— Էս ի՞նչ բան էր:

Կնիկն ասավ.— Գիտում չեմ:

Ասավ.— Ար՛ի քու էփած կերակուրիցը դու կի, որ ես էլ ուտեմ:

Ասավ.— Ես կերել եմ, դու ուտում ես՝ կի՛:

— Չէ՛, — ասավ, — ըստի մի հնար կար, որ կատուն տրաքվեց, դու պտի ուտես, որ եղն էլ ես ուտեմ:

Ինչ արավ, արավ ոչ՝ կնիկը մոտ չէկավ կերակրին. տեղիցը կազնեց ու թուրը քաշեց, որ կնկանը սպանի, Դևը ֆորումը «ա խ» քաշեց:

Որ «ա խ» քաշեց, Ֆորսկանը լսեց, իմացավ, որ ընդի իսան կա: Կնկանը թողեց, մտիկ արավ, տեհավ, որ ֆորումը մի Դև կա, Դևին էլ կտորեց, կնկանն էլ ու ածավ ֆորը:

Ընդհան ինքը թողուց ու փախավ: Թե հիմի գալիս ա իրանց քաղաքը, ախպորտանցե ա վախում, թե մնում ա են սարերումը՝ Դնի ախպորտանցե ա վախում. գնաց հասավ մի սար, մի ծառի տակի նստեց: Դա թող ըտի նստած մնա, մենք խաբարը Դնի ախպորտանցե տանք:

Ախպերտինքը միտք արին, թե.— Գնանք տենանք մեր ախպերը ի՞նչ հալի ա:

Էկան տուն, տեհան՝ ոչ ով չկա: Ման էկան տունը, տեհան, որ մի ֆոր կա, մտիկ արին տեհան, որ իսանի ջանդակ կա մեջը: Պտրուցք արին, տեհան իրանց ախպերն ու մեկ էլ մի հարս են, էրկսի ջանդակը իրար վրա ածած ա:

— Հա յ մադաթ,— ասին դները, դուս էկան,— մեր ախպոր սպանողին մենք գտնենք ոչ սպանենք ու արինը խմենք՝ մեր մոր կաթը մեզ հարամ ա:

Ասին ու ընկան սարերը, էկան տեհան, որ էդ տղեն մի ծառի տակ նըստած ա: Սա տեհավ, որ էս դները գալիս են, տեղիցը վեր կացավ, թվանքը լիքն էր, հմա էլ գյուլլա-բարութ չունի:

Դները սրան տենելուն քիմի, ասին.— Ժաժ մի գալ, քու վերչըն ա:

Սա քաշեց թվանքը մնին էրետ սպանեց, մինը վեր ընկավ, մինը մնաց սաղ: Տեհավ, որ գյուլլա բարութ չունի, սաղ մնացած դեր իրան վրա ա գալի, թողեց փախավ: Ինքը գնաց, դեր՝ եղնեն:

Թե շատ գնաց, թե քիչ գնաց, մեկ մենձ ջրի ռաստ էկավ. տեհավ, որ դեր հասնում ա, ընկավ ջուրը: Սա ջրով փախչում ա, դեն էլ դրաղից ա գնում: Էս ջուրը խառնվեց ծովին, դեր տեհավ, որ տղեն ծովն ա ընկնելու, ասավ. «Ես էլ ընկնեմ ջուրը՝ բալքի ընչկելա ծովը հասնելը բռնեմ»: Ընկավ ջուրը, չկարաց բռնի, էլի են լեղ էրետ, գնաց: Գնաց ծովը մտավ: Տղեն հասավ ծովը, դեն էլ եղնեն: Սա գնաց տեհավ, որ մի գյամի գալիս ա իրան թուշը, սա հրաքաթ արավ, լեղ էրետ, գնաց գյամու օղերից բռնեց: Որ բռնեց՝ գյամին հակվեց դբա էս տղեն: Գյամչին տեհավ, որ գյամին թեքվում է, դուս էլավ կտուրը, չորսի կռանը մտիկ արավ, տեհավ մի իսան գյամու օղիցը բռնել ա, գալիս ա, մի դն էլ եղնուց գալիս ա: Գյամչին մեղքացավ, չանգյալներ գձեց, տղին քաշեցին գյամու մեջը: Դեն էկավ, գյամուն տվուց, ուզեց, որ բատմիշ անի, գյամին փախավ գնաց, դեր մնաց:

Տղին տարան հանեցին դրաղը, ասին, թե.— Էս ի՞նչ էր էկել գլխիդ:

Էս տղեն սկսեց իրան գլխին ինչ որ էկել էր, նաղլ անիլ: Գյամչին, որ լսեց, ասեց.— Լավ բոլ հունարով մարդ էս ըլել դե՛, գնա՛ս բարով:

Թողեց սրան ծովի դրաղին, ինքը գնաց: Տղեն վեկացավ, ծովի են դրաղը մի քաղաք կար, գնաց էդ քաղաքը, մի քյասիբ մարդի տուն դոնաղ էլավ, էս քյասիբ մարդը ժառանգ չունեթ, եփ իմացավ, որ էս տղեն հեր ու մեր չունի, իրան ժառանգ արավ:

Թե շատ կացավ, թե քիչ կացավ էդ տղեն էս քաղաքումը, էդ աստոծ գիտե: Էս քաղաքի թքավորը միացավ: Սրանք մի առժամանակ կացան անթաքավոր, եղնա բերին դովլաթ դուշին գցեցին, որ ում գլխին վեր գա՝ նրան թքավոր դնեն: Էս դուշն էկավ, մեր քյասիբ տղեն մի քարի վրա, հեռու նստած էր, էկավ դուշը գլխին վեր էկավ:

Էկան էս տղին վերհատեցին, թե.— Դու ըստի ի՞նչ էս շինում, դուշը շըշկլեց,— ասին,— Էս ի՞նչ մարդ ա, որ սրան թքավոր դնենք:

Դուշը եղ տարան, սրան էլ ձեծեցին, կորավ գնաց: Եդ տարան դուշը մի սհաթ պըհեցին ձեռներին, եղնա էլի գցեցին: Դուշը վեր էլավ, պտիտ էկավ, են դատար խալխը թողուց, գնաց քաղաքից դուս էլի են տղի գլխին վեր էկավ:

Դշի եղնա գնացող մարդիկը գնացին տեհան էլի իրենց ձեծած տղի գլխին դուշը վեր ա էկել. Էս տղին էնքան ձեծեցին, որ բանից էլավ, ու ասին թե.— Կորի՛, գնա՛ որդի էլել էս՝ ընդի:

Սա էլ էկավ իրա հորացվի տունը: Էլի դուշը պտիտ գալով, պտիտ գալով էկավ ու էս քյասիբ մարդու տան հերթիկովը նի մտավ, էլի են տղի գլխին վեր էկավ: Էս դշի եղնեն էկող մարդիկը տեհան, որ էլի են քյասիբ մարդու գլխին կաղնեց: Տարան իրանց հմա թքավոր դրին:

Թքավոր դրին, հմա էս տղեն ասավ.— Ես թքավոր կըլեմ մի պայմանով, որ էս պետք է կնիկ չուզեմ:

— Չի՛ կարելի,— ասին,— դու պետք ա ունենաս կնիկ, որ քեզանէ ըլի ժառանգ, քեզանէ եղնը նա թաքավորութիւն անէ:

Ինքն էլ մտածեց, որ խելացի գրից են անում, ասավ.— Իրեք ամիս ինձ ժամանակ տվեք, ընդով էս ձեզ պատասխան կտամ:

Ասավ.— Տեր աստոծ, եփոր էս փառքին տիրացա, դու մի հալալ կաթնակեր ինձ դամաթ անես, որ էն դոյրաթն անի ոչ:

Դա էդ իրեք ամսեն մեշը մի քշեր էրագումը տեհավ Սպահանա քաղաքում մի թքավորի ախշիկ դրան բութա տվեց: Ախշիկն ընդի տեհավ, տղեն՝ ըստի:

Ըստիան դա ռավոտը վի կացավ լիսին, իրան նազիրվեզիրին կանչեց, ասավ.— Ձորք պատրաստեցեք, էս տեղ պտիմ գնալ:

Ձորք պատրաստեցին, սա վեկալավ, գնաց: Գնաց էդ քաղաքումը դուս էկավ: Սա էս կոնիցը քաղաք մտնելիս, էն կոնիցը թաքավորի ախշիկը իրան դարավաշներով բաղն ա գալի:

Կաղնում սեյր ա անում, ամա տենուլնուն քիմի իրուր ճընանչեցին, որ երագումը իրուր տեհել են ու խոսք են տվել, որ իրուր առնեն: Սա որ դըբա քաղաքն ըղու էլավ, ախշիկն էլ եղ դառավ, գնաց տուն, վեր էլավ իրանց բալկոնը, սկսեց սեյր անել:

Տղան էկավ թքավորի ամարաթը, վեր էկավ: Թքավորը դրան ընդունեց, ասավ.— Ի՞նչ մարդ էս և ինչի հմա էս էկե:

Տղեն ասավ.— Ես ֆլան քաղաքի թքավորն եմ, երագումս քու ախշիկդ ինձ դուր ա էկե, էկել եմ, ուզեմ, կըտաս՝ կառնեմ, չես տա՝ վեր կկենամ, կերթամ:

Թքավորն ասավ.— Էդ իմ ախշկա բանն ա, իրան կհարցնեմ, թե ուզեց՝ կտամ:

Ախշկանը կանչեց, հարցրուց, ախշիկն ասավ.— Ես էլ երագումս էդ տղին բութա եմ տվե, էսօր էլ հենց որ դրան տեհա, ճնանչեցի, որ իմ երագումը տեհած տղեն ա:

Ըտեղ նշան են առնում, նշան տալի ու բագում պատրաստութիւն են տենում, որ գնան տղի քաղաքը, հըրսանիք անեն:

Ստիան ճընապար են ընկնում, գնում: Ճընապարին թքավորն ու նշանածը մի տասը հոգով լավ ճամփով են գնում, իսկ դոշունը կրճաղաք ճամփով ա գնում:

Էս վախտին տասներկու դե վրա են ընկնում թքավորի վրա, որ թալան տան. սրանք որ ոտն են անում, որ թալանեն, թքավորն իրա ֆորսորդութիւնը միտն ա բերում, ասում ա.— Հարիւր տարվա սիլահը մի օր կհարկավորի:

Թաքավորութիւնը եղ ա դնում, հետի մարդկանցից մի թվանք ա առնում, տենում ա, որ բոլորը մոլորեցին.— Էլ էն տեղը չի,— ասում ա,— ու գյուլլա անում, տասներկու դնին էլ ջարդում ա, տասներկուսի գլուխն էլ կտրում ա, հետը տանում:

Որ դոշունին հասնում են, ասում ա.— Դուք ի՞նչ մուխաննաթութիւն արիք, որ իմ եղնա չեկաք, էս բանը իմ գլուխը բերիք:

Նրանք էլ մեղա էկան, թե . «Ամառվա օր էր, շոգ էր, կրճաղաք ճամփով իջանք»:

Գալիս հասնում են իրանց քաղաքը, սինդապետները իմանում են, որ թքավորը մենակ ճամփին տասներկու դնի սըպանել ա, գըլխընին էլ կտրել բերել, ասել են, թե. «Էս թքավորը շատ մենձ հունար ունի»: Բերում են օխտը օր, օխտը քշեր հրսանիք են անում, ուտում, խմում, քեփ անում:

Նրանք հասան իրանց մուրազին, դուք էլ հասնեք ձեր մուրազին: Չարըն ընդի, բարին ըստի: Աստծանէ իրեք խնձոր վեր էկավ. մինն՝ ասողին, մինը՝ լսողին, մինն էլ ալամ աշխարքին: